

Sparrow a causa hilaridad na YMCA

Awacero a dañ e anochi



ORANJESTAD(AAN) — Despues cu e prome anochi di presentacion di e maestro di calypso, Rey di calypso Mighty Sparrow, na Club Caiqueto, y cual anochi tabata pover bishita, e anochi siguiente na YMCA San Nicolas, Sparrow a haya un bon audiencia, y for di momento cu el a cumenza papia, habri e anochi cu humor, e ambiente di hilaridad a cumenza. Sparrow a cumenza relata

riba e historia di Calypso for di Trinidad cu yegada di catibonan y e desaroyo cu a sigui, manera a ser treci dilanti den e prome anochi di charla dos siman pasa na YMCA, y el a papia riba e sequencernan, y manera Chuchu Hoek y Hildward Croes a trece den di dos charla, a mostra riba e importancia di usa e machine como instrumento di sosten. Sparrow a duna splicacion di e diferente tipo di



calypsonan, con e cantante mester por sinti e cancion, y cu su presentacion mester por duna e publico tambe e ambiente den cual e cancion ta ser toca, sea tristo, humoristico, of alegre.

Cu e cancion, "Willy Dead" el a splica con un calypso por tin un significacion, y cu djis e actitud of presentacion di e cantante por pone e publico insinua otro cos, y tin biaha 4 of 5 diferente insinuacion cu no tin nada di haber cu e cancion mes.

Cu Willy Dead, el a djis baha cabez mira su carson, prome cu el a cumenza canta, y e publico a cumenza hari. El a bisa pa no insinua nada den pensamiento, hinca man den sako, baha cabez y atrobe e publico a cumenza hari, y atrobe el a laga sa cu no laga e



gesticulacionnan aki ponebo insinua loke e cancion no ta. Na un manera emociona el a canta e cancion cu e musica sonoro su tras, y cu publico hariendo e frasenan, pa na final splica "mi a cumenza na splica den e cancion cu Willy a fayece, pero boso ta bay tras di e frasenan, lubidando e prome dos frasenan, insinuando otro cos".

Esaki el a demostra tambe cu Congo Man, relatando den e cancion di e dos muhernan cu a topa cu e homber di congo y cu esaki nunca a come carni blanco den su bida. Sparrow a laga sa cu tur hende ta insinua un cos y bay te den falta di moralidad, mientras cu e prome dos frasenan ta bisa bon cla cu e ta den selva, y cu e muhernan a topa cu un canibal (cu ta come hende) y cu nunca a come carni blanco.

El a basa tambe riba e musica di machine, indicando cu musiconan ta lubida cu e machine tey pa asisti nan, no pa e machine domina nan cancion y a mostra riba e importancia pa lesa y skirbi musica.

El a splica tambe con por traha un calypso riba cada

situacion, djis observando y scuchando loke ta pasando rond di bo, y bo por sinta hinca un calypso den otro. Ora di temanan serio, mester percura pa bo tin un conocimiento di e tema, of di politica of di sucedidonan mundial, y pa esaki, educacion, estudio y estudio cu educacion ta hunga un papel importante.

Su consejo pa tur hoben cu kier sigui den bida di calypso ta: "studia, studia y studia, y percura pa bo tin un bon educacion prome cu tur cos" y masha aplauso el a ricibi pa esaki tambe.

Slinger Francisco, Mighty Sparrow tabata tin e publico den su man na YMCA y henter e anochi a basha den awa diez pa diez ora cu diripiente un awacero formal a cay, y cu na mes momento a pone fin na e anochi abruptamente, locual tur hende a alimenta pero a compronde e situacion.

Hopi a keda conversa riba e anochi despues cu awacero a stop di cay mas o menos 11.30 or pero e ora ey a yega na fin di e programa caba.